

PRIVATIZACIJA Iz pisma namjere američke kompanije

„Bosnalijek“ treba biti lider farmaceutske industrije

Aktivni pregovori sa IFC-om • Žele donijeti 240 novih generičkih lijekova

Multinacionalna generička farmaceutska kompanija „Alvogen Group“ iz Nju Džersija, koja ima namjeru da preuzme 19,26 posto kapitala Vlade FBiH u „Bosnalijeku“ i 8,37 posto dionica Međunarodne finansijske korporacije (IFC), članice Svjetske banke (SB), želi stvoriti čvrste temelje generičke farmaceutske industrije u BiH.

Zajednički interes

Kako nam je potvrdio izvor blizak „Alvogen Groupu“, u pismu namjere upućenom Federalnoj vladi američka korporacija navodi da smatra kako sarajevska firma ima potencijal da bude dio porodice koja predstavlja vodećeg proizvođača i prodavača farmaceutskih proizvoda u centralnoj i istočnoj Evropi, Americi i Aziji.

Kako saznajemo, „Alvogen Group“ u pregovorima sa IFC-om o kupovini svih njegovih dionica u



„Bosnalijek“: Snažan razvoj u narednih pet godina

„Bosnalijeku“ postigao je „zajedničko razumijevanje“. Sada pregovore želi proširiti i na Vladu FBiH.

„Alvogen“ i „Bosnalijek“ imaju zajednički interes za razvoj farmaceutske industrije. Cilj je da BiH za sljedećih pet godina postane vodeća zemlja u proizvodnji i prodaji farmaceutskih proizvoda, ne samo u centralnoj i istočnoj Evropi nego i Americi i Aziji - navodi se u pismu namjere „Alvogen Groupa“.

Ključna tržišta

Amerikanci smatraju da je ključ uspjeha za razvoj farmaceutske industrije BiH povećanje broja visoko kvalitetnih lijekova

koji će se proizvoditi u zemlji. Kompanija „Alvogen“ planira donijeti 240 novih generičkih lijekova u „Bosnalijek“. Ti proizvodi bit će registrirani i prodavat će se u zemlji i na ključnim tržištima Balkana.

Farmaceuti iz Nju Džersija najavili su i strategijsko investiranje u ljude, procese i postrojenja.

Oni nude snažan razvoj „Bosnalijeku“ u narednim godinama i mogućnost većeg broja zaposlenih. Smatraju da se „Bosnalijek“ nalazi na raskršću te da kompanija sada treba razvoj brzog investiranja u skladu s evropskim standardima. Predložili su i konkretan investicijski program. **F. VELE**

Sto godina iskustva

„Alvogen“ postoji već sto godina i uspješno posluje na tržištima Amerike i Evropske unije. Njen čelnik Robert Wessman (Wessman) dugo je bio izvršni direktor „Actavis Groupa“, jedne od najvećih svjetskih farmaceutskih kompanija.

Imaju iskustvo u privatizaciji u Srbiji, Bugarskoj i na Malti.

Nakon što je dobio otkaz u „Oslobođenju“

U općini ispunili obećanje i zaposlili Sakiba Smajlovića

Na prijedlog Nadzornog odbora novog preduzeća Radio-televizije Srebrenica, odbornici Skupštine općine Srebrenica na zadnjem zasjednju za v. d. direktora ove RTV kuće imenovali su Srebreničanina Sakiba Smajlovića, dugogodišnjeg novinara „Oslobođenja“, kojem je ova kuća uskratila posao.

Početak prošle godine Lidija Korać, direktorica „Oslobođenja“, na Smajlovićevu adresu poslala je obavijest o otkazu uz obrazloženje da je tehnološki višak, te ugovor o otpremnini od 1.020 KM.

- Kad sam bio kod urednice Vildane Selimbegović i rekao joj



Smajlović: Ide na čelo RTV Srebrenica

da nisam trebao dobiti otkaz zbog Srebrenice, mog rahmetli brata Kjašifa, koji je također bio novinar „Oslobođenja“ i koji je ubijen 1992. godine u dopisništvu u Zvorniku, te zbog mog rada, ona mi je rekla da je prošlost ne interesira - kaže Smajlović, kojem nije pomogla ni molba srebreničkog načelnika Osmana Suljića da ostane na poslu.

Ipak, nakon deset mjeseci, koliko je Smajlović bio bez posla, općinske vlasti u Srebrenici ispunile su obećanje da će mu one pomoći da dođe do novog radnog mjesta. **Me. S.**

Nova reakcija Srđana Dizdarevića

Riječ je o govoru mržnje

Uvjeren sam da će i Evropska komisija protiv rasizma i netolerancije javno iznijeti svoje stajalište

Srđan Dizdarević, predsjednik Helsinškog komiteta u BiH, uputio je „Dnevnom avazu“ reagiranje na tekst objavljen u našem listu 30. januara pod naslovom „Radončić: Ostajem pri svojoj izjavi“.



Dizdarević: Govorimo o diskriminaciji

- Negirajući ocjenu Helsinškog komiteta da njegova izjava o Duški Jurišić predstavlja jezik mržnje te da se on služi šovinističkim rječnikom kako bi diskvalifikovao

bivšu urednicu Federalne televizije, Fahrudin Radončić prigovara da nismo citirali njegovu izjavu mada je i on sam parafrazira. Evo te izjave: „Imamo situaciju da jedna gospođa koja je glavni urednik na jednom našem javnom servisu, koja nije Bošnjakinja, radi taj posao. Vjerujte, nama je drago da smo multietnička zemlja i da je to jedini slučaj u zemljama regiona - da neko ko nije Srbin, nije Hrvat, ko nije, ne znam, Crnogorac, može uređivati javni servis u zemlji gdje je pripadnik manjeg naroda. Ali, ne možemo dozvoliti da ta osoba, koja nije musliman, ima ambiciju da uređuje u našoj Islamskoj zajednici. Mi te stvari nazivamo, kao politička stranka, pravim imenima - je li to islamofobija, antibošnjaštvo... reći ćemo kad se odnosi na konkretne osobe...“

Ostaje, naravno, čitaocima da sami ocijene ovu izjavu, ali ona se nedvojbeno mora okvalifikovati kao jezik mržnje, šovinistički rječnik opte-

rećen rasnim, etničkim i vjerskim predrasudama. Uvjeren sam da će i ECRI - Evropska komisija protiv rasizma i netolerancije, javno iznijeti svoje stajalište koje ne odudara od onog kojeg je predočio Helsinški komitet.

Radončić nam, također, prigovara da ne vidimo da na Radio-televiziji Republike Srpske Bošnjak i Hrvat ne mogu biti glavni ur-

ednici. Ova optužba naprosto nije tačna, jer je Helsinški komitet taj koji deceniju i po govori o diskriminaciji na etničkoj i vjerskoj osnovi, pri čemu ono što se događa u RS, između ostalog, nije pošteđeno naših kritičkih ocjena. Problem je u tome što mi zaista ne vidimo nikakvog valjanog razloga da kada kritikujemo jednu pojavu, jedan događaj, stvar razvodnjavamo navodeći slične ili identične pojave u drugim sredinama.

Prisjetimo se samo, ilustracije radi, nastojanja da se prilikom osude zločina genocida počinjenog u Srebrenici navedu i ostala stradanja, čime će, vjerujem, naše stajalište biti razumljivije. Dakle, osuda jedne pojave ne znači da ona ne postoji drugdje, ali je naopako svako insistiranje da se konstantno negativne pojave pokušaju relativizirati, ublažiti, oslabiti sličnim pojavama u drugim sredinama - stoji u reagiranju Srđana Dizdarevića.

Odgovor Fahrudina Radončića

Duška Jurišić je i dalje bjelkinja

Radončić se pita kako u kritici Jurišićkinog posla Dizdarević može vidjeti rasizam

Činjenica da gospodin Dizdarević piše o svesmu osim o tome da li Bošnjaci i Islamska zajednica, odnosno muslimani, zaslužuju da i Helsinški komitet štiti njihova ljudska i vjerska prava pred višemjesečnom prljavom harangom na Javnom televizijskom servisu pod uredništvom Duške Jurišić, dovoljno govori o ponašanju gospodina Dizdarevića.



Radončić: Zašto postoje dva komiteta

Njegovo besmisleno etiketiranje na moj račun i najavljena reakcija Evropske komisije protiv rasizma i netolerancije (ECRI), kojom Dizdarević prijeti, još jednom pokazuje da domaći udbaši i sinovi komunističkih vladodržaca svojim „demokratskim“ vezama svakom Bošnjaku koji podigne glas u odbranu svog naroda montiraju najernje ideološke diskvalifikacije, pa čak i rasizam. Koliko znam, osim izgleda u Dizdarevićevim zlim očima, Jurišićka nije prestala biti bjelkinja.

Stoga, gospodinu Dizdareviću preporučujem da Helsinški komitet u BiH pokaže vlastiti primjer u nacionalnoj i drugoj toleranciji koju prigovara meni, i javno odgovori na pitanje zašto nije napravljen jedinstveni helsinški komitet za BiH, a ne, kako je sada slučaj, da jedan postoji u FBiH, a drugi u RS. Zar to nije svojevrsna poruka Helsinškog komiteta da institucija koja se bavi zaštitom ljudskih prava svojim ustojstvom praktično dijeli BiH na dvoje i da BiH zbog netolerancije ne može imati jedinstvene institucije. A, što se tiče reakcije ECRI, zar

ne bi bilo logično da se ona oglasi i protiv vrlo prisutne islamofobije. I, zašto gospodin Dizdarević nije našao potrebnim da reagira kada su dvije novinarke FTV-a i na sudu dobile Jurišićku, koja je nad njima vršila mobing na nacionalnoj osnovi, jer su Bošnjakinje (a taj isti sud ih je vratio i na radna mjesta sa kojih ih je ona nezakonito uklonila).

Helsinški komitet u Federaciji je pun afera, političkog sluganstva i radi se o pojedinačnoj zloupotrebi jedne vrlo važne institucije, o čemu su novinari „Avaza“ nekada pisali, a kompromitirani Dizdarević sada pokušava jeftino i glupo da se sveti najprimitivnijim pokušajem falsificiranja mojih izjava iza kojih, naravno, i dalje stojim. Uostalom, zašto nije odgovorio na moje pitanje da li bi javnosti Srbije, Hrvatske ili Crne Gore, pa i tamošnji helsinški komiteti, dozvolili nevidenu harangu i blaćenje katoličke ili pravoslavne crkve i njihovih autoriteta na tamošnjim javnim servisima, kako se to ovdje u FBiH već predugo čini.

Također, javno pozivam gospodina Dizdarevića da ne zloupotrebljava časnu instituciju Helsinškog komiteta u stranačko-rivalske svrhe, jer je isti član Političkog savjeta Naše stranke, pa je jasno da ga općeprihvaćenost Saveza za bolju budućnost BiH očigledno s razlogom boli - kaže se u odgovoru Fahrudina Radončića.

Zahtjev Udruženja invalidnih i hendikepiranih osoba

Izmijeniti dokumente o prihodovnom cenzusu

Udruženje invalidnih i hendikepiranih osoba u BiH zatražilo je jučer od Vlade FBiH da hitno pristupi izmjeni dokumenta „Zajam za razvojne politike (DPL)“ zaključenog s Međunarodnim monetarnim fondom (MMF).

Udruženje pojašnjava da po tom dokumentu Federalni parlament do 26. marta mora usvojiti zakon, prema kojem bi od 1. januara 2011. prestala isplata invalidnina borcima, čija visina prelazi cenzus.

- S obzirom na iskustvo da je pr-

ihodovni cenzus po propisima Ministarstva za boračka pitanja Kantona Sarajevo oko 130 KM, to bi značilo da bi više od 95 posto RVI ispod 60 posto invaliditeta ostalo bez invalidnine - navedeno je u saopćenju.